

Unseri Wunsch und Sammelkische  
simmer jetz am usemische  
Deggel uff mir sinn barad  
e baar vo uns dye findes schad  
doch das isch jetze Glägehait  
für Transparänz und Offehait  
nur zwai dye findes ärgerlich  
sinn gege,, Sesam öffne dich ,,  
doch z letscht e määnd gän mir uns Mieh  
s dörf jede öbbis use zieh  
als erschte kunnt dr Gigi dra  
ganz vorne linggs dr erschti Maa  
är längt in d Kische das glaubsch nie  
denn är duet d Ackermaa usezieh  
als Presidäntin isch sy gwäält  
är maint : dye het mr grad no gfäält  
jetz muess dr ganz Regierigsroot  
am Morge wanner aane stoot  
wäge ihre aine singe  
well sy d Gitarre mit duet bringe  
und sy hofft dasses guet döönt  
sy isch das vo dr Schuel här gwöönt

Als näggschte isch dr Kevin dra  
wo in d Kische länge ka  
und är zieht dr Baschi Dürr  
ich main do ka är nüt dr für  
dass dä sich aifach aanestellt  
und übere Stroossestrich verzellt  
bi dr Kasärne gäbs jetze grieni  
Strich wo nur de Kätzli dieni ( de Nutte )  
dört zaigi jetz e Piktogramm  
an re Latärne s Opferlamm  
wo sich muess däglich duurebyse  
zum uffdämm Speerplatz aine z rysse  
normal do reedet er scho gepflägger  
unsere Sicherheitsdirägger

Hinderem Kevin stoot dr Edi  
dä macht bim Zieh dye gröscht Komedi  
är het scho Päch das muess me gsee  
denn är zieht s Fasnachtscomité  
dört inn isch s Drummeli au enthalte  
dä Saich sait är kasch sälber bhalte

Bierdeggelwärbig mache sy au  
aber Bilett kaufe will kai Sau  
jetz wänn sy no mit Gottessäge  
uff dr Bühni Waggiswäge  
au s Rahmestüggli-Experimänt  
balangsiert me zletscht e määnd  
jetz zwüsche Fortschritt - Tradizion  
sait dr Schaad am Telifon  
me haig e Profi angaschiert  
wo ganz klassisch produziert  
zum 80zigschte jä dye Übertrybe  
dät dr Papscht e Stüggli schrybe

Vorne rächts s isch immer so  
duet dr Alain ane sto  
und was dä zieht do wird me stutzig  
„ Gsetzwidrigi privati Nutzig „  
anderscht umme z letscht e määnd  
goots ums Spesereglemänt  
jesses het das Kader bschisse  
vo dääne wurd me kain vermisse  
nai ich glaub me wurd begriesse  
wenn e baar in d Kische miesse  
jeemernai waisch wye mängmoole  
het ain im Hof e Auti gstoole  
und isch mit dämm denn haimegfaare  
denn nach em Lohnusswys haissts spaare  
dr gröschti Profitör haisst .....  
es haisst är haig dye gröschte Aier  
dä 90 Kilometertrigg  
zieht är duure är wohnt z Frick  
bim ihm und jedem Offizier  
git zwai und eins halt immer vier  
Dienschtfahrzüg wärde so beschribe  
unter Paragraf zwai siibe  
„ s ganze Kader au die mit Pflutzen  
dörfen dye Auti nicht benutzen „

dr Pascal git sich zimmlig Mieh  
s het zwar nümm vyl zum Usezieh  
und trotzdämm duet är richtig straale  
denn är zieht s Thema Baslerwaale  
zerscht e moll d Frau Ackermä  
dye hämmer scho am Afang ka  
jetz wäri no dr Cramer neu  
grad im Momänt frisst är kai Heu  
är isch no in dr Fase ... lehre  
wye kasch dy gege e Wessels wehre

und was d Frau Herzog duuremacht  
dye het sich nämmlig rächt verkracht  
mittem Levrat ihrem Boss  
und sym ganze SP Tross  
sii maint är fallere in Rügge  
är sait : de bisch e falschi Gugge  
du hängsch an d Rosch und an d Novartis  
und goosch uff dääne ihri Partys  
au lyysli muult dr Beat Jans  
es het so döönt wye : dummi Gans  
es käm e fangs in grossi Mode  
all dye Fässer ohni Bode  
und ebefalls setzt sich in d Nessels  
mit NAF dr Peter Wessels  
sy „ Härzstügg „ ischem voll in d Hose  
jetz wämmer no dr letschti lose

dr Remo dasch dä nach dr Mitti  
vo vorne rächts isch är dr dritti  
als allerletschts zieht unsere Fründ  
„ SP will d Stadt mit no me Hünd „  
am Märggtplatz gäbtis das wär arg  
nach Soland e wytttere Hundeparg  
und sii gseet no rächt in d Wytty  
s gäb Schiessbude und e Rytty  
dr zue e grosse Frolicstand  
mit Kueche Keeks uss erschter Hand  
und mit Vertrag das wär au neu  
gäbs drey vier Hüsli vom Toi Toi  
und wens e moll im Hund nümmlänggt  
und är dr Keegel use zwängt  
das wird benutzt denn ohni Klag  
als Teerersatz für Neubelag

So jetz isch unsri Kischte läär  
sy isch zum Lüpfe nümmlänggt so schwär  
au wüsse mir und das isch toll  
zwei siibzää isch sy wiider voll  
denn kömme mir wiider mir säggs Schygge  
vo dr Gwäggi – Waageclygge

---

*D'Ladäärneusstellig isch vom Fasnachtsmändig z nacht, em  
06. Merz bis am Fasnachtsmittwuch demorge, em 08. Merz  
Uff em Minschterplatz. Me kaa dert au die ganz Buschle  
Zeedel, dr Rädäbäng und d'Blaggedde kaufe. Uff em  
Kasäärneareal sin zer glyche Zyt d'Requisite und d'Wääge z  
Bschaue. Mir fraie ys uff iire Bsuech.*